

# INUIT ATAQATIGIIT

## INATSISARTUNI



1. marts 2010

FM 2010/134

Inatsisartut Suleriaasianni § 32 naapertorlugu aalajangiiffigisassatut siunnersuut imaattoq matumuuna saqqummiuppara:

**Pisinermut inatsisip nutarterneqarnissaanut imaluunniit pisap Kalaallit Nunaannut nuunneqarnissaanut taamatullu nammineq malittarisassiuussisinnaalernissamut siunertaqartumik Naalakkersuisut danskit naalagaaffiannut saaffigineqqullugit peqquneqarnissaannik Inatsisartut aalajangiiffigisassaattut siunnersuut.**

(Inatsisartunut ilaasortaq Naaja Nathanielsen, Inuit Ataqatigiit)

### **Tungavilersuut:**

Kunnikkormiut peqqussutaasigut danskit pisinermut inatsisaata Kalaallit Nunaanni atuutsinneqalermalli pisorpassuaqarsimavoq. Taamaniilli danskit atuisartut atugaat pitsanngorsaavigineqarput, inatsillu pisiffissat periarfissallu nutaat takkuttuarneri naapertorlugit nutarterneqartarsimavoq, soorlu tusagassiutini atortut digitaliusut eqqarsaatigalugit. Ullumikkut nipilersugarpassuit digitalimik pisarineqartarput. Kalaallit nipilersugaasa nunarsuatta sinneranut tuniniarneqarsinnaanerat eqqarsaatigigaanni soorlu iTunes-ip aqputigineqarsinnaanera tulluurtuuvog.

Ullumikkulli tamanna Kalaallit Nunaanni imminut akilersinnaanngilaq inatsisitigut nutaanngilisoqarsimanera pissutigalugu. Nunami maani pisisoq pisereernermit utertitsinissamut pisinnaatitaaffeqarpoq. Pisiarli digitaliuppat pisinnaatitaaffik taanna isumaqanngilaq, tassami pisisoq kopimik digitaliusumik sulii tigummiqarsinnaassammat.

Danskit pisinermut inatsisaanni maanna atuuttumi utertitsinnaanermut pisinnaatitaaffinnut pisiat digitaliusut ilaatinneqanngillat. Pisinermut inatsisip nutarterneqarneratigut imaluunniit pisap Nunatsinnut nuunneqarneratigut pisinermut tunisinernullu tunngasutigut ullutsinnut naleqquttumik aaqqissuussinissatsinnut periarfississaagut. Tamanna ilaatigut ima kinguneqassaaq pisisoq utertitsinissamut sivilisunerusumik piffissalernerneqassammat, tamannami inatsisip Kalaallit Nunaanni atuutsinneqalereernerata kingorna danskinut ilanngunneqareersimammat.

Aamma eqqarsaatigineqarsinnaavoq Kalaallit Nunaannut pitsaanerussannginnersoq pisaq danskit naalagaaffianniit maanga nuukkaanni. Danskit pisinermut inatsisaat ilaatigut EU-mi maleruaqqusanut naleqqussagaavoq. Tamannalu Kalaallit Nunaannut tamatigut attuumassuteqanngilaq. Pisamut oqartussaaffik nuukkutsigu immaqqa inuiaqatigiinni pissutsit aallaavigalugit inatsimmik ilusilersuisinnaanngornerussaagut.